

藍山縣圖志卷三十五

序志篇第十二

凡先錄舊序次自敘次題名

桂陽州知州蔣學成序

萬曆四年按州志載此為隆慶藍山縣志蓋誤序內稱謝令即謝祖縣志以祖為萬

曆時任又祖自序稱丙子亦即萬曆四年

為政當先問俗志以稽往蹟觀民風典至鉅也藍山隸桂陽居楚西南極邊余叨守郡按圖籍攷求康治之術以郡舊志病於繁迂議重修因公事詣藍徵志閱之率俚瑣不經獨物產詳記下至作菹合醬之微而大者反或略之縣令謝君頤川進曰邑志廢久矣成書備考守土責也吾有志焉而未之逮其邑學博張君潔泉毅

藍山縣圖志

卷三十五

序志

一

然任其事遂謀諸司訓劉君石屏搜故實採遺蹟提綱析類不數月編成其用心亦可謂勤且敏矣乃白之謝尹肅幣走使請余言引其端余惟修邑志者宜取有關政體及切於時事之大者而記之所以鏡往證今備觀省昭勸戒患在失實而無當也斯志成而要者補繁者刪秩官人物有傳山川賦產畢陳學校修而風化之本端戎伍練而防禦之策豫宦斯土者循是而修之謂為治藍金鑑可也記事云乎哉

邑令謝祖序

夫郡縣有志尚矣顧錄者尚博則摭拾廣述尚奇則鉤致奧突尚詞則組織麗藻求其博而不迂奇而不詭詞而不汗漫而可以信

今傳後者蓋亦尠焉。藍志修於正德戊寅劉君文華歲久而事跡闕泐人亡而文獻寥落丙子孟夏州尊定宇公按定宇為蔣學成號按屬抵藍察民瘼省方俗暇登宗濂書院之顛慨然見山河如此其鞏固也。因徵志乘以進則見遺佚者失次者。整體裁者認認乎觸於目也。乃喟然曰是志也容已於修乎遂以其事屬余。余僕僕吏役且匪才也。於時秉筆則學博深泉張君。校正則石屏劉君。草創則庠生朱子邦典陳子昉彭子繼簡彭子大敘輩。書既成以呈於定宇州尊覽而善之遂命梓以竣其事。僉謂余當有言於簡末噫奚俟余言之贅哉茲志修而藍之天文地理王制民風煥然蔚然俾後之觀志者無疑義焉以庶幾於信今傳後足矣。

藍山縣圖志

卷三五

序志

二

邑令王元壽序

萬曆時在謝祖之後

藍山居楚南鄙夙稱難治數十年來良吏罕有善徙者故視藍山為畏途余濫竽斯邑朝受任而夕飲冰矣夫藍治簡僻非有徵發期會鞅掌案牘之煩也非有使車絡繹供億旁午之勞也且地多沃土非有中澤悲噉化離流亡之患也賦輕於昔亦無竭澤殫軸追呼敲扑之苦也雖土逼諸徭盜賊充斥近幸疆場甯謐非有羽檄桴鼓之警也藍之難治者獨以俗犴惰窳民習囂悍訟可囂也賦可匿也文可舞也鷲擊繩之挺而走險使及於寬政又網漏吞舟長吏卽素號强悍者至藍而靡矣巧於催科者至藍而拙矣治安得不難而令又安得以善徙也夫民目不知有禮讓我治以令

甲必且以爲欺罔我而周內我也。誰其信之。則欲束其耳目。柔其心志。莫若使習於先世之風氣矣。大都山居之民。其性激。然其初質直近古。中爲習染稍漓。猶多自好。至囂凌諱詬。飢法捍網。則其未流然也。載邑之風氣者。莫備於邑志。余甫下車。索之民間。出斷編於故紙中。縱魚豕莫辨。然藍民先世風氣。可見什一於千百也。爰咨故老。稽於文學。重輯付梓。是志也。山川無雲夢七澤之奇。游眺無黃鶴鸚鵡之勝。風雅亦無湘沅長沙之瑰麗。惟是先民之遺範。太初之渾樸。猶有存者。昔何淳而今何悍。昔何樸而今何囂。昔何恂恂。一稟於矩矱。今何以跳越自甘爲躍冶之人。假令挽其末流。漸而復其本初。治藍者又何難焉。昔夫子憂周末文勝。思徵夏

藍山縣圖志

卷三十五

序志

三

商之文獻以正之。余之輯藍志也。夫亦徵文獻之極思乎。

教諭葉應芝序

與王元壽同時

自古吏治。莫盛於神雀五鳳間。而龔北海黃頴川。尤以興起文教爲急務。當時褒擢。固自特異。而班氏傳循吏。亦首列之。則其故可思矣。錢塘王公。來令三藍。飲冰蒞政。百廢具舉。而其指尤在興學校。厚風俗。時萃四封之俊。而督誨之。俾以時呈其業。而躬爲甲乙。其次第。間或進而與之談說疑義。揚挖今古。蓋公之得於經術者深。往往以文學飾吏治。治甫期月。絃歌百里。文化翔洽。余亦藉庇以無曠職業焉。尋又俞士大夫之請。修輯邑志。鳴琴餘暇。徧訪故實。而一秉以空平之衡鑑。不三月而告成。卷凡一十有二。無論其

文章無媿天祿石渠之秘。其所綱攝縷析。確有章程。若叔孫禮樂
位置精當。而其躊躕規畫。灑灑洋洋。若鼂大夫論兵事。賈太傅慷慨
譚政務也。詎特邑之士民有所誦法。彼其指示利病。動中窾綮。
悉示之。以致治成法。後之爲邑者。一展卷間。儼然對獨孤之鏡。恍
然提記事之珠。龔黃文教。猶在一時。公且垂之永久。無斁已。異日
國家所以褒擢我公者。豈僅僅璽書黃金。賜爵拜水衡而已哉。乃
公則猶若有所未愜者。豈以三藍僻遠。無軒轅章華郢鄂麋子之
跡。有可稱說。無九章九辨白珩幸臣之對。可以薈萃。而其入抑少
包胥卞和春申江上丈人之流。足以供模寫。遂不無稍用寂寂耶。
然余聞之。弇州先生曰。千古而無子長。不能成史記。夫亦政爲此
也。公可以無憾矣。

藍山縣圖志

卷三十五

序志

四

訓導王景曾序

康熙初序內周君則邑侯周之瑜也

余抵任之數日。邑侯周君屬曰。藍志宜重修。今子司鐸。盍任其責。
是時軍需急迫。夙夜匪懈。惟恐民傷。觀其意。蓋以寬厚之政治
民。民當感戴。恐後而茲有不盡然者。嘗引以爲歉。感他務之多未
遑也。余慨然曰。子產治鄭。民不能欺。子賤治單父。民不忍欺。西門
豹治鄴。民不敢欺。夫德不足者待威德。至於使人不忍欺。復何事
之不可治者。此寬厚誠求之驗也。藍邑邊徼。寬惠慮不足以治。雖
然。朝歌渤海。麇鼈虺蜴虎豹蛇螭之區。皆造物以貽豪傑建勛樹
業之處。况藍邑乎。人材不擇地而生。風氣亦自有升降。侯無慮此

藍邑之猶待治也。持此寬厚之道，秉樞軸而持鈞衡，莫不游刃而有餘矣。侯今者拳拳於邑志之必修，亦卽以寬道得民之本也。其以此明教化，厚風俗，裒然成康樂之書，一轉移間耳。侯曰：是惡敢當。然余實深維侯所以化民者，具存乎此。區區之懷，附志一言，以告後來。若曰：因之千里，則不敢知云。

邑令鄭夢坤序

康熙八年

藍山居九疑東麓，虞帝南巡，陵寢所在，則藍山蓋湯沐邑也。源發濂溪，圖極有衍，則周夫子遺澤也。吾道南矣，斯文在茲，匪道何程。匪猷何承，詎謂聖賢霑被之區，無當輶軒之採，而縣志不必傳哉。余承乏此邦，爰攷前志，一曰藍器，二曰匿賦，三曰摯擊，則挺而走

藍山縣圖志

卷三十五

序志

五

險。若是其難治也。將節錯根盤，無用斷金之利矣。士元守耒陽，子明令平江，皆三苗地，風尚大略不遠。之二公者，斲輪不傷，類救時人傑者之所爲，而况矩賢矔聖，察時變而用權衡，溫之涼之，與民宜之，甯慮政寬民慢，政猛民殘，不克張弛合度耶。志首疆域，至別志，卷共三十有二，大約取裁於名學博，與膠庠通經術者，互爲參訂，聚腋成裘，洵美且備。然揚厲山川景物者過多，而忠孝節廉之事，訐謏碩畫之章，闕焉無聞。文詞雖贍，猶未聞君子之大道也。百川學海而至於海，向來協帝之餘徽，濂溪之遺韻，尙有未盡湮沒者乎。胡爲今昔不相及，而致疑於振民育德者之鮮其術也。聞之勞則思善，藍民亦旣已身之矣。樸則生文，藍士亦旣有其質矣。山

愈峻水愈駛。蜿壇而鬱積。必有卓犖瑰琦之氣。發爲菁英。俾珥筆
蘭臺者。載之國史。其爲藍志重。亦可知矣。企疑峯之蒼蔚。溯濂溪
之清靄。觀風俗人才之淑且盛也。表名都之文獻。增有司之寵光。
書曰。謨猷入告。禮曰。砥礪廉隅。則余之略景物而詳奏議。刪武俠
而錄節孝也。此物此志也夫。

邑令劉涵序

康熙五十五年

爲政之道。必鑒於古。而質文繁簡。則惟其時。若夫人情土俗。又必
隨其地而調劑之。凡皆惟邑乘是徵。此誠非具文也。余於壬辰秋
七月攝篆是邦。見其風土人物。不異名邦。索志觀之。久歸蠹劫。明
年擬輯。有志未逮。頃者李大中丞飛檄飭修縣書。余悚然曰。此守

藍山縣圖志

卷三十五

序志

六

土者之責也。乃進邑人士謀之。僉以屬之學博劉君葛民。余曰善。
於是葛民午夜辛勤。殫志竭思。蒐集謝周鄭三君子之殘篇。旁求
省府通志諸鄰縣志。三閱月而告成。余展視細繹。大都文直而事
核者。本諸龍門詞贈而事詳者。原諸扶風有條有緒。不漏不贅。用
敢賁呈中丞。加以裁定。光以序文。付諸剞劂。觀是志者。苟取其敘
述之詳。紀錄之實。則文質之際。兩無遺憾。由是而傳之。可以久而
不墜矣。

教諭劉世臣跋

世臣卽前序葛民

古者太史採風。庶邦政治得失。周知無隱。自詩亡而春秋作。是非
好惡之公心。衰貶予奪之正義。裁自聖心。游夏莫贊。是春秋乃史

之祖而志則史之支派也。雖然可輕言哉。春秋事簡而文約。意隱而義深。宋胡文定竭一生之精力。自謂直窺閭奧。而朱紫陽猶不滿之。然則春秋者。史之經也。生民所未有也。若夫後春秋而起者。自詡三長。往往言繁詞贅。而義蘊易盡。若遷若固。猶有遺議。方志可知矣。故史視春秋而遞降。志又視史而遞降。然卒不能不志者。車書一統。各有職貢。無慮山陬海澨。咸以其塊然而聚之山川。蔚然而生之人物。鏤然而錯之文章。登之邑乘。上之王會。蓋倣古職方版圖之意矣。予困蹟棘屋。已三十載。自辛卯承乏斯庠。閱今五稔。寸祿之濡。常懼非才。踣涼性成。動多柄鑿。每於花晨月夕。瀏覽山川之勝。莫逆於心。自以爲吾道不孤也。迨今夏五。介石劉侯承

藍山縣圖志

卷三十五

序志

七

李大中丞命輯邑志。屬余偕諸子執役。不辭固陋。乃爲搜殘帙。溯源流。別異同。考正似訂。魚魯文於斯。獻亦於斯。甯樸毋華。甯揚毋抑。甯闕毋濫。雖云集腋。亦多就簡。嗚呼。愁如平子。愁而不韻。窮類少陵。窮而未工。卽繼此踵事有人。增華有日。而以無文之言行遠。豈牛涔可益滄海。螯力可負泰山哉。雖然。以此俯仰藍嶺錦屏之秀。唐源舜水之奇。其靈異固自在也。爰跋數言。以寄遐心云爾。

邑令曾伊蔚序

按舊志秩官不載其名。據序稱乾隆十八年。當在李榮裕之前。

藍山志初修於康熙丙申。出遷安劉介石及湘潭劉葛民手。逮雍正戊申。宋前令與學博孫克敏。又續增數事於第四卷。并揭櫫前後爲四百二十五頁。嗣又朽蠹。僅存十之六。予以乾隆十八年孟

秋攝篆。求全志不得。旋卸事去。及仲冬。又奉委來署。遍索藏本。得三部。搜署內舊板一百八十片。去其重複殘朽者。核查所缺若干頁。命梓人補刊。悉依原本。未嘗增減一字。但存其舊而已。或有請入近年典故及秩官人物者。五日京兆。不暇及此矣。志內鹽政第九頁。及卷末孫跋首頁。末由刊補。姑缺以俟。

教諭何同曾序

與曾伊蔚同時。序稱呂翁。蓋伊蔚號呂宣也。

乾隆十八年秋。邑侯呂翁隸任。未至境。藍人歡騰走賀。恍如嬰孩之遂所瞻依。蓋翁初宰永興。尋調江華。循聲洋溢。膾炙久矣。藍距江最近。善政善教。浹洽在心。故一聞其來。而行者歌於塗。農人慶於野。商賈歡於市也。及視事。一切便於民者。無不知之。無不爲之。

藍山縣圖志

卷三十五

序志

八

若庖丁解牛。批卻導窾。恢恢乎游刃有餘也。藍故號巖邑。自翁視之。忘其爲盤錯矣。一日披閱藍志。有闕略者。有蠹蝕者。問其板亡及其半。翁懼其久而愈散佚也。別錄完本。釐訂脫譌。捐俸補刊。兩月而竣。春秋魯史也。聖人裁制。而衰鉞之義凜然。遂舉千百世之史家。無能出其範圍者。因其舊也。今藍志雖舊。而山河城社。廨宇祀典。賦役坊表。以及關津物產之繁。條理井井。尙未卽於淪亡也。翁因舊而整飭之。故府之章程。皆維新之鉅典。亦猶魯史而春秋也。不然翁非靳於志者。先是治永興時。承無完志。翁周咨博採。手勒成書。邴之六屬。傳爲善本。豈詳於彼而略於此哉。翁蓋有權衡於其間焉。雖然。今日之藍志。翁固不居於作。然多方採訪。以完其

舊是亦藍志絕續之會也。後有繼者，得茲刻而更行，所無事，厥功
顧不偉哉。翁今者新奉天子命，作郡於靖南楚之風土，人物漸收
於兩袖清風之中，行將翼贊彤廷，珥筆全史，舉吾楚之故家遺俗
流風善政，本其所閱歷者，盡入編摩，發皇楚寶之光，楚人同聲頌
禱之無涯，豈第藍人之感慕，披志乘而動謳思哉。余舊近門牆，今
庇棠蔭，躬逢其盛，敢竭鄙誠，用以揚訖於萬一云。

邑令譚震序

嘉慶十
二年

昔人論化民成俗，在有以利導之。又曰：修其教，不易其俗，執是二
者以求，則邑乘要矣。何者？山川封域，人所素安者也。田賦學校，人
所素習者也。數百年來，孝弟貞良，耆儒碩彥，人所風聞而競羨者，

藍山縣圖志

卷三十五

序志

九

也。卽其所安所習所競羨者而利導之，民以是化，俗以是成矣。余
自丙寅春來此，搜索縣志，片板無存，得民間藏本，殘缺失次，謀修
未果。今閱三稔，邑諸生慮百年內之事實猶湮也，以修志請，簿書
鞅掌，未遑從事。而學博同年楊筠洲勸成之，並偕淡吾魏君以纂
修爲任，輯稿者有天長王九窻，分校者閤邑諸子也。遲之久而告
竣，失次者敘之，殘缺者補之，未載者續之，百年內之事實煥然一
新。使藍之民戶給一篇，人傳其事，以爲某也。孝弟得揚其芳，某也
貞良得表其烈，某也耆儒碩彥得述其詩古文詞，是尙不可以興
乎。雖然，山川封域，田賦學校諸志，尙有不可易之規。至於風俗人
物，或十年一變，或數十年一興，此不可以尋常例者。今之風俗，其

尙有樸而不華。純而不襍。如吾鄉尹秦所云者乎。抑或狂情竄習。囂悍舞文。匿賦如前。令王元壽所云者乎。今之人物。其尙有步南宮。膺鸚薦。如楊庭芳。陳思道。諸先輩者乎。抑或淡於勢利。獨好清修。如浮邱翁。潘逸遠。一流者乎。廣表百餘里內。上下百餘年間。當必有採之未盡。訪之未周者。余不敏。不能化民成俗。以副聖天子簡命之心。願藉此志。以化藍民。有厚望焉。

訓導楊毓瑞序

即譚震序內之筠洲也

鄭氏夾漈云。江淹有言。修史莫難於志。志之大原。出於爾雅。若摘浮言。略事實。不足盡義。由是以談。非獨國史然也。邑志亦然。今如山川之流峙有常。而稱名時易。城郭之創建有所。而遷改或殊。戶

藍山縣圖志

卷三十五

序志

十

口之登耗不齊。風俗之質文屢變。守土衛民之成勞。各著。孝男貞婦之立節。特奇。以及泉石山林。不無高士。嘯歌流寓。亦有俊人。凡此之屬。考之古簡。信而有徵。稽諸口碑。同然不惑。然後記之爲志。勒之成書。於以信今傳後。庶幾無悖也。藍山縣志。其造端於有明正德間者。固大輅之椎輪也。然規模不可獲睹。其綴修於國朝雍正年間者。又罅漏小補。取材無多也。今所得據。依以窮源。竟委者。恃有康熙丙申歲。邑侯遷安劉公涵。司諭湘潭劉君世臣。所手編。雖或不免於鄭氏所譏。至其分門別類。彙括多端。使邑人士數典。不忘其祖。不可謂非二劉之功也。傳歷百年。日飽蠹魚。板片烏有。滇西譚篋園同年。來宰茲邑。憫前書之就湮。感後事之莫續。屬其

役於友人天長王國琳九憲使主筆札開局於嘉慶丁卯凡增新改舊收採人物詩文皆九憲獨斷戊辰冬刊稿成篋始披閱之而有不愜於心復挽毓瑞與同寅魏君淡吾酌訂之淡吾謝以課子未遑毓瑞力辭再三稿本束閣彌年紳士復繼請不得已強起應事乃取劉志與王稿參互校勘頭緒紛如有更之不可勝更者惟除其違礙之尤正其偏頗之甚遷就已定之編次證以老志之公平益寡衷多無負篋園委重如斯而已若夫搜金石之遺文訪名山之秘迹事必舉典語必透宗草木蟲魚無微不闡盡爾雅之義以爲志則有所不敢幾抑是書也毓瑞未經手之先聞有陸續竊取全部以去者既非成書終爲廢紙今日已不足爲徵他日何難辨其僞任彼藏之可已

藍山縣圖志

卷三十五

序志

十一

教諭魏大名跋

即譚震序內之淡吾也

藍志顛末諸君詳敘之矣茲役始於丁卯秋時余以鄉試晉省不獲與聞越明年刊稿成庚午又訂正之其將訂正也邑侯譚篋園先生委余與同寅筠洲楊君公論咸以爲然余竊以志史之流也自念三長既無曷敢鹵莽又復鏤板已全更張重費固謝不敏楊君遂獨任其勞書成余忝備員斯土得列名簡中要之成始成終不遑參贊而是非得失亦非所敢知謹述數語白之將來

邑令楊侃補刻邑志跋

道光二十四年甲辰

邑之有志所以別疆里紀風俗觀人文辨物產也藍山地據楚南

上游境與粵東接壤。其山川之險阻。城垣之建遷。士習之盛衰。民
徭之聚處。與夫土地所宜。物產所出。凡有關於政治者。既有志備
載。雖歷時久遠。守土者覽之。可以悉其利弊而興除之。然則邑志
所繫大矣。辛丑冬。予承乏斯邑。甫下車。徵閱藍志。蓋自嘉慶己巳
歲重修於篋園譚君。僅閱三紀。而板已剝蝕不全。竊用嘆惜。旋得
一舊本。披覽之餘。命吏出遺板校對。計殘缺者七十一帙。捐貲鑄
補。令掌記者珍而藏之。志中所載疆里風俗。人文物產。尙多缺略
未備。余欲集邑中紳士。商訂刪修。有志未逮。聊事補苴。以待後來。
國家重熙累洽。教澤涵濡。已二百餘年。窮徼邊隅。何地無才。藍邑
雖彈丸。其間人事地宜物產之屬。諸所宜採更者。正自不少。生斯

藍山縣圖志

卷三十五

序志

三

土者。稔見熟聞。豈真甘心簡陋。終以湮沒於世而不傳哉。則藍志
之續修。不惟守土者之責。亦邑中士民之責也。是在繼起者矣。

邑令胡鶚薦序

同治
五年

余以丙寅春。攝篆是邦。訪儒學兩孝廉。曾公敬齋。高公雲階。詢以
地方之事。孰先。二公曰。他不得知。惟試院與志書續修。爲不可緩。
志書則邑人士有志而尙無成議。試院則前任未摻全局。而已有
始基者也。余曰。請先從事於試院。而徐及志書。未幾巡撫李大中
丞檄下各州縣修志。以備省志採擇。其勢不能不并務而兼營矣。
然二事并舉。勞費重。地瘠民貧。久困兵燹。其將何措。爰請儒學紳
士等籌畫者久之。以按糧攤捐之說進。每兩銀捐錢三百文。完餉

帶收。遂據以上聞，得允。於是經費有所從出，復商兩學於鄉城中。擇舉首事某也，纂修志書某也，督修試院某也，職司監修某也，職任筮鑰不數月而試院成矣。甫期年而志書又成矣。蓋未嘗不嘆邑人士之矢慎矢公，乃以有此也。既而局紳請爲志序，若以余心力交瘁，不勝感激者然。余曰：是役也，諸薦紳之辛勤，兩學師之贊助也，余何功焉？特余有私心竊幸者，試院修於乾隆，迄今已百餘年，志書修於嘉慶，今亦數十年，此百餘年數十年中，豈無賢有司措意此事者，而卒告成於余代庖之一載也？斯真躬逢其盛矣。

邑令洪錫綬序

同治六年

壬戌歲，余宰隆武，與藍接壤，卽聞此都山川清淑，民物恬熙。丁卯

藍山縣圖志

卷三十五

序志

三

春承乏來此，見乃益信。所接見邦人士類，多君子之行，以故訟事簡，案牘稀，余深幸此地之易於圖治，而得以藏吾之拙也。既念界連嶺嶠，俗雜狎獍，僻壤徭疆，康樂乃爾，斯亦大奇。披閱舊志，始知爲密邇舜陵，德教涵濡，垂數千百年而不墜，蓋有虞氏之遺澤長矣。適新乘脫稿，纂修鍾君範進稿見質，並問序於余，細加校閱而有感焉。夫志，鄉國之史也，豈惟紀風俗、人文、山川名勝云爾哉？將以維風教、備掌故、寓勸懲、昭法戒、畱指南於官方，惠後學以遐覽者也。藍志自嘉慶重修，迄今閱五十餘年，凡方域城池、學校、祀典、官師、田賦、戶口各大端，不過間有增益耳。若乃風教所繫者，有忠孝節義、人才所出者，有賢書貢士、名業所成者，有文武仕宦、或捍

循鄉里。或行善一隅。或建白國家。凡此敦龐成象。風會日新。以視前此有其過之。故自星野方輿。以逮人事政化所原。風俗所成。蓋靡不綱舉目張。可觀可鑒。則斯志也。可謂燦然大備矣。吾知守斯土者。讀是志而講求吏治。以制乎因革損益之宜。生斯地者。讀是志而緬懷先哲。以振其鼓舞奮興之氣。均於是乎在。乃樂觀厥成。謬爲之序以歸之。

邑人鍾範跋

胡洪二令任內
修志。範爲纂修。

舊志修於嘉慶己巳。迄今五十餘年矣。同治五年丙寅。李大中丞檄各屬修志。豫章胡公適蒞藍。力任其事。與學師曾高二公。籌商經費。開館纂輯。武林洪公繼任。政簡刑清。公餘輒親爲編校。範以

藍山縣圖志

卷三十五

序志

古

譚陋承命執役。從鄉先生後。鋪觀掌故。晨夕綴比。得挾策以繪盛治之規模。而寫昇平之景象。幸何如之。然竊念舊志歷歲既久。事勢頓殊。未敢輕爲更易。唯缺者補。新者增而已。間與舊異者。如添列儒林。增編事紀。校官武職。併入秩官。壽考僑寓。不歸人物。皆一聽邑侯與鄉先生之命。輒有呈稿。復蒙釐正。分門一十有五。爲卷一十有七。肇事於丙寅秋八月。越丁卯夏五月。而書成。範以繆悠之學。濫厠竽列。無以稱塞大夫士庶之至意。朝夕悚惕。幸而卒事。後之覽者。知我罪我。又何如也。

自上列諸序跋觀之。藍山縣志可攷者。蓋修撰者七。補葺舛版者二。尋清嘉慶間。訓導楊毓瑞序。稱藍山縣志造端於明正德間者。

規模已不可睹。故舊志載原序。自萬曆四年邑令謝祖始。州志藝文誤列爲隆慶藍山縣志者也。自漢初設縣至明。乃肇有縣書。中間千數百年。豈絕無紀載。是殆闕亡多矣。或曰。縣隸桂郡。自吳左中郎張勝。桂陽先賢畫讚。見隋書經籍志。實始有傳。而方志著述。趙宋特盛。度其時。若鄭文寶。趙汝澹輩。賢明宰官。治平康樂。必有成書。遞嬰世變。沒焉無徵。亦事之常。卽如桂陽州志。以湘綺之博古。亦僅據羅大奎隆慶時志。其周端朝桂陽志。鄭紳桂陽圖志。二書。早見於宋史藝文志。鄭氏通志者。亦付諸杳冥。不可知之數。而明史藝文地理。列天下郡國志夥矣。桂郡無稱焉。文獻不足。自宣尼已抱杞宋之感。後侗曷聞乎。輒近聞藍山縣志。同治六年。胡鶚

藍山縣圖志

卷三十五

序志

五

薦洪錫綬。二令相繼有述。用縣人拔貢鍾範爲纂修。歲貢生厲楚英。李望祁。拔貢沅江。教諭陳若虛。爲協修。其事例見範自跋。用意矜慎。述而不作。越今六十餘載。清命旣改。且二十禩。縣父老興言。故實游騁新軫。宜有著見。以繼往開來。而據之無窮。咨眾諧議。豫事不跲。公推陳晉芬。雷在陽。梁超漢。成亞傑。劉焯等。爲籌備員。旋開志局於東城。監修者。自縣長鄧以權。有縣人廖挹湘。鍾才宏。彭世俊。成鳳韶。鄧湘南。劉校青等。編輯。則成守廉。雷在陽。鍾才濩。李鑒。三黃毅。劉焯等。採訪。則雷一桂。唐宗權。李福梁。超漢。雷運權。邱鎮南。郭占城。鍾華紳。利運瀛。劉鎮湘等。而以嘉禾雷飛鵬爲主修。時民國十八年冬十月也。飛鵬方攜嘉禾縣志稿。長沙旅寓。煩困

畢札深喻艱難。懼不敢承。致書請辭。十九年三月歸里。審查嘉禾志稿。故人成守廉鄧湘南二君來。請之堅。不得已。乃以五月應命一行。集會監修編輯採訪。臬當事邦人君子。議訂體例。錄其各種冊表。以爲採訪張本。訪稿送編輯彙草。然後以送於主修。事有所聯。由分而合。復示限期。俾無遲曠。比屈旬日。以校刊嘉禾志役。東下金陵。約九月回局。及抵湘。兵火阻道。幾不克免。廢然返塗。乃於八月告至。至則移編纂處於塔下寺觀瀾亭。始得媻壹從事。諸篇草創。若建置禮俗。則本於雷在陽鍾才。濩教育。則在陽才濩劉焯。財賦。則才濩獨任。食貨。則黃毅。民國事紀。則成守廉專任。選舉。初擬李鑒三。旋以屬之才濩。人物諸表尤繁。則在陽才濩焯鑒三等。

藍山縣圖志

卷三十五

序志

六

更番爲之。守廉於人物官師。有所錄舉。旋主編戶籍及節孝表。會病。諸編輯乃互致其稿。會才宏自江海歸。託以都勘。才宏辭曰。此非游夏所能贊也。飛鵬進曰。此事於君。乃繼祖志。義豈能卻。遂乃委心讎正。助我良多。然於人物。終不置一辭。謂月旦不敢以加人。是其慎也。於是以前二十年七月稿。掬定。九月召開審查大會。自監修編輯採訪測繪咸與。益以地方當事及諸父老爲審查員。五十人。鉤稽事實。有斂有正。表圖或損或益。又越數月。飛鵬乃得彙而次之。維炎漢初縣。填於秦戍。是號南平。荒服實曆。李唐改稱山啟。筆路。邦之杌隍。再遷乃固。莫徭砥屬。百越遠馭。政化弗迷。維新中度。赫赫巖疆。存乎智數。作沿革表。民事案表。刑事案表。城廂圖。疆

域總分圖述建置篇第一維幅員形制良止坎流都龐鍾深實阻
實悠萬泉飛山千峽導溝巢樹而宅畫郊而疇有倚有徇濟之以
舟有驛有亭速以置郵靡險不夷無隱不周賦高開蠻有思而謳
觀碑駐馬古蹟遺畱諸存乎山系水道者附以水道圖水表巖表
泉井表田洞表陂壩表塘堰表存乎交通者附道里表亭表渡表
橋表交通圖存乎故迹景物者製爲風景圖登錄辭令以發奇蹤
而通氣求述山川篇第二維田宅居業事端滋起邊傲叢脞尤號
難理妖由人興道喪運否天人之交禍福所紀昔苦徭變今患盜
匪藪澤腹疾行逢山鬼哀我生民全者有幾訓政奮時論衡弘偉
匍匐救之在能篤棊述事紀篇第三維神明胄裔朔暨南荒邦之

藍山縣圖志

卷三十五

序志

七

先民盛自有唐自戶有役或以逃亡漢徭旣狎相助守望滋生予
復清政亦良八屯易民政平俗厚四十六村來歸恐後四隅五鄉
食息以阜自治在人德齊地醜編鄉隅都甲表戶口總表戶口分
表徭俗所在地表團防名地表團防隊義勇隊表自治畫區表述
戶籍篇第四維禮緣人情俗繫風化祭則有秩自上達下野祀近
淫或興或罷人道始終冠喪昏嫁古有今亡愛禮及羊讓寸得尺
宏獎善良蹈徭鼓歌亦自清揚但革其訛毋卽於狂以此爲民之
坊編文廟禮器錄樂舞譜從祀人表屬之典禮編廟寺表屬之俗
祀以逮民間通常禮事歲俗方言徭俗有宜刪要而不可護者述
禮俗篇第五維禮樂興於政教正俗資乎育材自三物六行好音

不懷科舉攀輓用非其才詩書糟粕學校大開藍士自奮時與之
偕接軌歐美妙我化裁瓶器寄盛傳說邪回語焉宜擇道迺弗乖
錄舊新教士蛻化之迹附縣立高級小校以上各學校表初級小
學校表各級學校歷年畢業人數表學齡兒童統計表述教育篇
第六維學校人才選辟用行周後勘聞利祿苟營科第勇爵保薦
捐納賄賂夤緣其途紛雜選眾慎登任賢使能鄉縣省國以莫不
兢與民變革害除利興國初眾院鍾郎實膺有光於縣大猷允升
錄清季省諮議局縣自治會民國以來縣議會省議會國會國民
會議諸案附藍山縣屬城鎮鄉自治區所表選舉臨時縣議會議
員表藍山縣民國二年縣議會議員選舉表參事會會員表藍山

藍山縣圖志

卷三十五

序志

六

縣舉行省憲法選舉省議會議員表舉行省憲法選舉縣議會議
員表述選舉篇第七維舉事需財徵自土地舊制輸役今言納稅
俱謂義務權重會計預算決算國用所寄孰卹時艱誅求無藝植
官如林餉兵如蠶天不悔旤菑害迭至澤竭猶漁魚枯猶涕莫謂
腴鄉公私交弊君子道國宜示節制諸凡屬之國賦者條列近三
年田賦分類徵收表契稅表雜稅收入表屬之公收入者條列閭
縣學田賓興表各鄉賓興賢文會田表城工城隍廟昭王廟田
表城鄉育嬰堂不忍堂田表各高初兩級小學校田表近三年路
股附加分類徵收表地方附加分類徵收表十七年善後附加分
類徵收表團費附加分類徵收表諸凡屬之歲出度支者縣政府

近三年度支表。舊監獄近三年度支表。警察所近三年度支表。舊財產保管處近兩年度支表。財務局十七年下半年度支表。財政局十八年十九年度支表。教育局近三年度支表。教育局近三年度支表。初級中學校近三年度支表。女子職業學校十八年度支表。挨戶團總局近三年度支表。餉械監理委員會十八年度支表。自治專員辦公處暨調查委員會十八年度支表。自治籌備分處十八年度支表。林務辦公處十八年度支表。賑務分會近兩年度支表。述財賦篇第八。維農牧之國。寶藏不盡。竹木林豐。畝鍾穀稔。日用生活。酌劑盈虛。示儉戒奢。差可自圖。器物求新。工商肆巧。浸淫無涯。遂失所寶。救匱在約。生眾用寡。秉道億貨。權衡操舍。

編農產物表。穀糧產量暨民有概數表。虞衡產物表。土產製造物表。土產外貨平均價格表。土產土銷暨外銷概數表。土產外銷外貨土銷比較表。客工概數表。歲計入出總額概數比較表。藍山各墟市度量衡比較表。藍山富民墟度量衡與工商部頒發標準器比較表。附食鹽案。濬鍾通航案。述食貨篇第九。維以人治人。在官在民。等之旌賢。以揚芳芬。循良泐石。功德祀社。如或遺臭。未易滌瀉。繫乎人心。匪物可假。庸言庸行。善善從長。身否道泰。采烈非常。一能足式。有美宜彰。壺儀人瑞。邦家之光。區爲官師賢達孝友義行忠烈方術列女諸傳。於官師附歷任職官表。民國以來職官表。於賢達附仕宦表。封贈表。舊科名表。新科名表。學位表。於忠烈附

國殤表。於列女附節孝表。貞烈表。而以男壽表。女壽表。殿焉。述人物篇第十。維重華過化。夔龍輔問。文明自古。典謨足訓。南交辨章。早通上郡。文學翔實。不在謏聞。舊帙多湮。感歎麟角。近有作者。先覺後覺。探珍握珠。庶幾丘索。述藝文篇第十一。凡茲十一篇。四十五圖。百零五表。五十六列傳。始漢高祖二年。訖民國二十年六月。爲二千一百一十有八載。藍山故事。蓋抑略備矣。昔鍾纂志。沿襲前例。闕文爲直。罔敢離次。今括諸篇。以類從系。上續七修。儻言弗忌。大夫君子。嘗聞高義。其有未詳。以俟多識。始役於庚午五月。期年之間。幸告畢事。費由附加。民力並致。都爲書三十五卷。五十一萬二千幾百幾十字。國民政府方在徵求各省縣風土故乘。攷班

藍山縣圖志

卷三十五

序志

三

應之異同。供政教之注記。刊成若干部。以上有司。分存民間。庶資觀感。而垂奕世。作序志第十二。

大中華民國二十一年月日。藍山縣志局主修清舉人雷飛鵬。監修藍山縣縣長長沙鄧以權。新田劉兆聲。湘潭黎澤泰。縣人清附生前縣議會議長廖挹湘。廩生日本弘文師範畢業前吉林督軍署司法課長江蘇奉賢縣縣長成鳳韶。廩生日本大阪高等專門工業學校畢業翰林院檢討前農商部僉事彭世俊。廩生日本東京實科學校畢業前湖南省議會議員縣挨戶團總局副主任鄧湘南。舉人眾議院議員前湖南財政廳長鍾才宏。湖南游學豫備科畢業前汝城縣長劉校青。編輯貢生前江西候補州判湖南省

議會議員成守廉。拔貢廣東直隸州州同前署南澳巡檢雷在陽。廩生湖南高等師範館畢業鍾才獲。附生前縣教育會會長慈善公會常務李鑒三。湖南公立法政專門學校畢業前澧州鎮守使署軍法官農會幹事黃毅。湖南第三師範畢業前教育局局長劉焯。採訪。附生前縣議會議員雷一桂。附生前縣議會議員唐宗權。附生湖南大學特科畢業李福。前縣議會議長第三自治區董邱鎮南。附生前郴縣警察所長第四自治區董梁超漢。監生前湖南都督府科員雷運權。湖南公立法政專門學校畢業郭占城。湖南南路師範選科畢業前湖南財政廳科員鍾華紳。達材校畢業劉鎮湘。前縣議會議員利運瀛。測繪。湖南高等工業學校畢業永明

蒲銑。湖南高等工業學校畢業彭壽身。國民黨藍山縣區分部籌備員雷巽。縣挨戶團總局副主任朱樹欣。保安隊大隊長胡文焯。副隊長李錫慶。財政局局長劉靈生。廖廷圭。財政委員會常務陳誦芬。教育局局長鄧國蔚。教育會常務幹事孟憲。縣督學員鍾華籌。楊嘉柱。第一學區教育委員蕭秉奎。第二學區教育委員南鳳。聯合高級小學校校長雷明劍。第三學區教育委員舜鄉高級小學校校長成紹傑。第四學區教育委員黃子豐。第五學區教育委員黃雲衢。警察所長鄧政文。茂典獄署署長劉震湘。郵政局局長黃友文。林務專員曾文選。商會長兼賑務分會常務楊晉文。商會長胡錫麟。種痘局主任雷潤時。通俗教育社週刊主筆陳冰若。第

一自治區董鍾才濂。第二自治區董雷識劍。第五自治區董黃定甲。縣中學校長黃雲瑞。彭究德。縣立女子職業校長陳蕙芝。城立第一高級小學校長鍾華樸。蕭達青。南鳳聯合高級小學校校長厲汝楫。大慈高級小學校校長楊澤蔭。舜鄉高級小學校校長黃際時。集豫衡高初兩級小學校校長蕭燦文。審察會審察員。除前已列名外。附生蕭壽森。附生厲玉山。監生劉鏞。附生田積書。附生鄧秀芳。附生曾聖與。廩生廖鼎弼。附生胡廷魁。附生陳晉芬。前警察所長鄧紹芝。前游擊隊分隊長楊純學。中學代表陳國珍。農會代表陳鳳飛。賑會代表黃光祖。教育局代表薛希瑄。自治二區代表鄧秉常。志局測繪助理。蔣蔚青。黃俊琪。唐開泖。陳光位。志局書記員。陳揚鸛。陳光炎。李昭乾。雷宏賓。賀禧。陳瑞典。黃卓。繕寫零陵。蔣松濤等。

藍山縣圖志

卷三十五

序志

三

跋

志乘徵信之文。一字寓於褒貶。流聞撫拾。著錄艱難。况乎鼎革之間。旨趣各異。前視爲賢爲達。今而爲乖爲迂。最難隻眼獨具。週覽無物。一舉一動。恆視其心。新命舊章。一爐融貫。不偏不易。傳德之眞。其爲得時之中。取法乎上者。按藍山縣志。修撰凡七。補葺殫版者凡二。自清同治六年復修之後。迄今已六十載。人物益彰。滄海幾變。不憑刊紀。後法伊誰。縣父老興言故實。咸懼湮沒。因於十八年冬十月。聘嘉禾雷艾室先生飛鵬爲主修。先生學通兩漢。兼採朱程。以壽以文。三朝堪述。山川遊歷。藻績文章。越一寒暑。全稿牘定。幾經慎擇。分別彙次。都爲書三十五卷。凡如干言。澤泰少習庭藍山縣圖志

卷三十五

跋

訓宦游十稔。萍影未息。承乏斯土。下車之日。全志已成。而先生已移客桂陽。尙一通牋候。政書暇日。偶參校閱。督工補訛。愧治其末。是歲冬十二月。先生忽歸道山。遠道聞之。頻揮凍涕。鉛槧旣出。斯爲獲麟。撫摩墨痕。不禁感喟。憶自先君太史公見背。于今不過五年。翻念仍世交游。父執幾登鬼錄。耆英遺逸。強半凋蕭。幸茲冊之觀成。爲不刊之鉅製。爰贅小言於後。以志墨緣云爾。民國二十二年癸酉五月。藍山縣縣長黎澤泰謹跋。

跋

藍山縣志創修於民國十八年冬。余久客燕都。二十二年夏歸而志成。同人屬重校。因不能無言焉。慨自人羣進化。工商業之競爭。已由國內而推演於國際。故一邑之書志紀載。宜著實。而文章藻飾。猶屬餘事。今吾邑修志。注重採訪測繪。凡物產土宜。農田水利。以及山川形勢。道路交通。靡不搜載翔實。圖繪精詳。由一邑而推之一省。而全國。工戰商戰。皆足取資。斯富強之基也。可爲志乘特放異彩矣。及讀至人物篇。不禁戚然憂之。以鄉先哲之一言一行。皆得載入專傳。而先伯父先父獨不與也。先伯父諱金輝。字石樵。性精明。遇事善謀斷。時人有孔明之目。且擅長書法。而以大草爲最。學懷素。頗得神似。從弟琪。杰。皆善書。蓋猶有父風焉。先父諱棟輝。字仲常。爲人寬厚。喜周人急難。至今鄉里稱之。謂余及弟世偉。子鈞。姪彝鼎。女華琚。求學海內外。稍有成就。皆沐先君子之遺澤者。生平酷嗜丹青。所作山水花卉人物諸畫。人爭藏之。視同元明大家之遺。嗟夫。一門中伯也。工書。仲也。工畫。儻所謂難兄難弟者。非邪。校閱畢。爰跋數語。並當補傳云。彭世俊謹跋。

